



*Senin, 8 Agustus 2022*

**Ogen: Ezeziel 47:1-12**



**LAU SIMPEPALEM**



Lau emekap sada kebutuhan pokok si tuhu-tuhu penting bas kegeluhen. Emaka adi la kenca lit lau tulpak kel kerina pendahin ras ngganggu kerina kegeluhen e. Kalak si jore megati iandingken desken kalak si erburak-burak sumbul lau ibas ia, sementara adi sangana susah megati ikataken "sangana kerah". Ibas nubuatan kerna pembebasen bangsa Israel, Tuhan mereken nubuat man Yeheskiel kerna lau. Lau selaku sumbul kegeluhen si ndarat arah rumah pertoton nari. Mentas arah negeri ras ngadi I Laut Mate.

Laut Mate jine, eme lautan si kandungan sirana seh kel buena, ban buena adi erlangi kita je, la banci gedap, ras perban masinna lalit nurung si ngasup nggeluh ije. Tapi Tuhan ernubuat makana kenca maler kari lau ibas rumah pertoton e nari, maka asa kai taneh siibentasina turah sinuan-sinuan janah seh pe ku laut Mate lau siibas Dibata nari erbahanca maka lanai masin laut e, sehmaka nurung-nurung pe enggo pang nggeluh ije.

Enda sada gambaren maka adi enggo kenca sialoken Tuhan, ia me lau si mpepalem kegeluhen enda. Taneh si kerah ngatakenca geluhta si lanai memungkinkan guna banci sikap, tapi e pe banci ipesikap Tuhan ngulahi. Ija erkiteken dosa ras perbeben maka nggo masin kegeluhenta e pe erkuasa nge Tuhan mpelimbaruisa.

Tuhan kap lau kegeluhen. Ise si ernalem kempak Lau Kegeluhen e, lau e simpepalem luka-luka ras kinilasertanta. Saberlah kita janah teklah. Tuhan la pernah ebuah, adi nggo inubuatkenNa e pasti jadi. Kegagalan bangsa Israel ngangkai sura-sura Tuhan ngajari kita, gelah ola celus kumas lubang si seri peduakaliken. Janah padanNa selaku lau si mpelalem erbahanca kita pang "percaya diri" nepet dalin siisuruhNa, amin gia mbue perbeben ras arus maka kita e teriluh. Tuhan si mpepalemsa kerina luka-lukanta.



Blank writing area with a wavy top edge.